

金錄齋放生儀

淨穢

法事

九清之上 高澤於至真

六合之中 用資於洪貺

恭炷道德真香 遙空啟奏供養

三境高真

十華上聖

諸天日月星斗宿度群真

三元三官大帝

北極四聖真君

靈寶五師真君

祖天師正一真君

九天天曹諸司聖眾

五嶽五山之神

地府幽陰聖眾

金錄齋放生儀

清微藏書閣

水府扶桑大帝三界十方真宰

恭望居有勿有中鑒無勿無內 傾光回駕 監真度生 臣伏以

一元判天地人物之形 道涵萬化 庶類布動 植飛潛之象 品列三

才 稟賦之質雖分 陰陽之情固具 貪生惡死 同趨利避害之心

渴飲飢餐 均求飽謀安之念 皆根源於元始祖氣 實肇分於太極真

精 奈流俗之乖仁 徇世緣而非義 陸張水捕 合置羅以掩群 射

宿驚棲 設網罟而併命 憫彼微物 罹此何辜 以今欽奉綸音 崇

建寶齋 宣揚玉範 慶成釐事 克荷玄恩 再秉宸衷 用贖生命

縱之林野 俾自在以逍遙 放之源泉 獲安閑而游泳 咸遂有生之

樂 用弘無上之恩 仰望三寶慈尊 九清上聖俯從丹悃 洞鑒淵衷

體聖君隆天厚地之仁 增延睿筭 遂萬物戾天躍淵之性 永固皇

圖 普使寰區 同躋仁壽 稽首皈依

無極大道

飛潛高下各流形 總是先天祖氣成

宿劫業因誰結習 今生異類且經行

遭逢網罟冤仇債 放贖林泉惠澤深

作善降祥隆萬壽 福覃寰宇樂升平 和不可思議功德

伏以轉煩惱 作菩提 仁恩廣大 以神奇 化臭腐 厚德充同

雖胎卵濕化之業報有殊 而生老病死之機緘則一 幸脫離於黑網

來會合於清壇 既向無生 而獲有生 已拜聖主好生之德 當由

有念以至無念 共超大道希夷之關 悟多生趨向之非 識正性指歸

之樂 隨緣展轉 超覺地以安閑 任運逍遙 證福鄉而遊宴 永脫

鱗介羽毛之苦 獲生安樂清靜之邦 恩不虛捐 當效珠環之報 德

宜漸積 須堅金石之忱 稽首皈依

無極大道

四生流浪久沈淪 業力膠纏本性昏

幸際恩光歸彼岸 宜回覺照脫迷津

惡都落滅冤愆罪 善地皈依惠愛仁

厚德無垠知感戴 密垂福慶萬齡春 和不可思議功德

放生

伏以 集康寧妙德之福 由積世之精修 憫蠢動含靈之情 本

宿生之業對 六塵輪轉 萬劫循環 有地獄 有天堂 品類均明於

金錄齋放生儀

清微藏書閣

趨向 無眾生 無壽者 飛潛同受於陶鎔 以今道氣旁周 靈光下

燭 上帝普昭天漏泉之惠 群生膺回骸起死之仁 翩翩雲飛 山深

林密 洋洋川泳 海晏河清 藉聖主仁德天齊 好生志切 植今辰

之福果 綿億載之洪基 陶九有之春臺 開八荒之壽域 清眾虔誠

諷誦如法

靈書中篇

向來

回向

放生功德 無限良因 仗三寶以證明 冀眾真之鑒映 伏願

仁及草木 化洽蟲魚 盡宇宙高下之中 仁風披拂 極天地圓方之

外 惠日舒明 悉令萬類之沾恩 不使一夫之失所 上報生成之德

旁敷化育之仁 凡厥有情 悉歸正道 為如上因緣 念

玄都萬壽天尊

太平護國天尊

好生度命天尊

福生無量天尊 不可思議功德

金錄齋放生儀竟

天運壬辰年巳月正一天師清微弟子洪鼎堅羅大英恭錄彙編
蔣科靜複校

金錄齋放生儀

清微藏書閣